

Dithero tsa Tirelano mo Kutlwanong

21/2014 Ka Sontaga o o bidiwang Letare, e le ka 30. 03. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 226 - 212/220

2. Thapelo: Modimo Mong-wa-thata-yotlhe, Rra rona yo kwa legodimong, mapelotlhomogi a gago a tsoga a le mašwa mosong mongwe le mongwe, le fa re se na tshwanelo epe o re naya molemo otlhe o o re tlhokang mo mmeleng le mo moweng. O re neele Mowa o o Boitshepo wa gago gore re amogele molemo otlhe wa gago ka dipelo tse di tletseng ka tebogo le boitumelo, e bile re go direla ka go utlwa, re kopa jalo mo leineng la Morena Jesu Keresete, yo o busang, a tshela mmogo le wena le Mowa o o Boisthepo ka bosakhutleng. Amen.

3. Epistolo ka fa thulaganyong ya 2 e kwadilwe mo go 2 Bakorinthe 1:3-7;

Efangele ka fa thulaganyong ya 1 e kwadilwe mo go Johane 12:20-26.

4. A go ipolelwe tumelo ya bokeresete!

5. Sefela sa 229 - 215/223

6. Thapelo ya mmadi wa thero.

7. Epistola ka fa thulaganyong ya 6 e kwadilwe mo go kuJesaya 54:7-10, e re: "Ke ne ke go tlogetse sebakanya se sekhutswanyane, mme ke tla go phutha ka mautlwelo-botlhoko a magolo. E rile ke tuka bogale, ka go fitlhela sefatlhego sa me sebakanyana, mme ke tla go utlwela botlhoko ka bopelotlhomogi jo bo sa khutleng. Morena, Mogolodi wa gago o buile jalo. Gonne tseo di tshwana le malatsi a ga Noa mo go nna. Ke ikanne ka re: Metsi a ga Noa ga a kitla a tlhola a ralala lefatshe. Jaanong ke ikanne jalo ka re: Ga nkitla ke go galefela le e seng go go kgalemela. Le fa dithaba di ka suta, le fa dithabana di ka reketla, bopelotlhomogi jwa me ga bo kitla bo tloga mo go wena; kgolagano ya me ya kagiso ga e kitla e reketla. Morena yo o go utlwelang botlhoko o buile jalo." Amen.

8. Thero: Barategi mo Moreneng, go thata jang ne, fa Modimo o galefa, fa Modimo o fitlha sefatlhego sa gagwe mo bathong ba gagwe. Rotlhe re a itse gore rona batho ga re na tshwanelo epe go amogelwa ke Modimo, mme go re tshosa, fa re kopana le go galefa ga Modimo. Re a itse ditiragalo tsa kgolagano e kgologolo, fa Modimo o betsa baba ba Iseraele le morafe wa ona. Bogale jwa Modimo bo ka bolaya batho ba le bantsi ka tshoganyetso. Fa Modimo a fitlhela sefatlhego sa gagwe, re mo kotsing ruri, re tshwana le batho ba ba mo bobipong ba ba kgaotswaneng le Modimo. Go kgaogangwa le Modimo go thata, le fa ke ka sebakanyana fela.

Modimo o ne a kgothatse morafe wa ona ka sebaka gore ba tlihabologe, ba tlogele tsela e e bosula. Mme batho ba gana go utlwa, ba sotla baporofeti le barongwi ba Modimo. Le fa Modimo o ne wa solofetsa gore o tla betsa morafe, batho ba ne ba sa utlwe. Gongwe ba na le poifo, ba sa tokafatsa botshelo jwa bone. Jaaka ekele batho ba na le selekanyo se sele fa ba bala sebaka sa go galefa ga Modimo, batho ba akanya gore Modimo o tle o ba lese mo botshelong jwa bone, le fa ba le maswe thata. Gongwe ba re, Modimo o tshwanetse go na le pelotelele, fa re leofa, o tshwanetse go re fa sebaka go tlihabologa. Mme fa Modimo o galefa, o re betsa, rona ga re na pelotelele, ka tshoganyetso re lela, re raya Modimo gore o re itshwarele, o re ntshe mo petsong.

Molaetsa wa molao o re: Rona re tshwanetswe ke petso fela. Fa Modimo o re athola ka selekanyo sa tshiamo ya molao, rotlhe re tla kgaoganngwa mo go ona. Mme se se itumedisang ke gore Modimo o na le molaetsa o mongwe wa Efangele wa re: Ke tla go phutha ka mautlwelo-botlhoko a magolo, ke tla go utlwela botlhoko ka bopelotlhomogi jo bo sa khutleng.

Baporofeti le barongwi ba Modimo ba ntsha molaetsa o, go gomotsa morafe wa Israele le batho botlhe. Ba senolelwa bopelotlhomogi jwa Modimo mo dikwalong tsa Beibele gore le bone ba dumele lorato lo logolo lwa Modimo. Lorato lwa Modimo lo o re ratileng ka lone lo dirile gore o re romele Morwaa-ona, e bong Jesu Keresete.

Jesu Morena wa rona a tsena mo dipogisong gore rona re nne le kagiso. Ene a tsena mo go tsona go utlwa go galefa ga Modimo. Re gakologelwa mafoko a gagwe mo sefapaanong, fa a kua a re: Eli, Eli, lama sabagathani? Ke go re: Modimo wa me, Modimo wa me, o ntlogeletseng? Re a itse lebaka – lefoko la Modimo la re bolela gore

ke lorato lwa Modimo. Ka ntlha ya lorato, Modimo o ne a betsa Morwa ona. Petso e e neng e re tshwanetse ya wela mo go ene. Jesu Keresete o ne a tlogelwa ke Rara ka ntlha ya rona, gore rona re ruangwe le ona.

Ya re Jesu a ne a tthatlogela kwa legodimong, o solofeditse barutwa ba gagwe, gore o tla nna le bona go ya bokhutlung jwa lefatshe. Ka ntlha ya loso lwa gagwe, rona ga re tlhole re kgaogangwa le Modimo. Jesu a re boleletse gore: "Fa mongwe a nthata, o tla tlhokomela lefoko la me, le Rre o tla mo rata; mme re tla tla go ene, re age mo go ene." Joh 14:23 Le fa go ntse jalo, re ntse re mo nakong ya go dumela, e seng ya go bona. Ga re bone sefatlhego sa Modimo – le fa rotlhe re itse gore ka dipaka tse dingwe re a itse sentle gore Modimo o gaufi le rona.

Mme re dirang, fa re utlwa gore Modimo o gakalanyana, o ne a ba fitlhela sefatlhego ka sebakanyana. Kgato ya ntlha ke gore re itlhatlhobe go lemoga ka fa re leofang ka teng, gore re tlabologe, mme re leboge Modimo gore Morena o watlhaya yo a mo ratang. E tla re re sena go ipona molato, re ithute go tshwara lefoko la ona le le reng: Le fa dithaba di ka suta, le fa dithabana di ka reketla, bopelotlhomogi jwa me ga bo kitla bo tloga mo go wena; Lefoko leo le re tiisa mo pelong, gore re dumele boitshwarelo jwa Modimo. Mme re ithute jaaka Paulo gore "bopelotlhomogi jwa Modimo bo lekanye mo go rona, ga se gore sengwe le sengwe mo botshelong jwa rona se tla nna botlhofo fela. Mme re a dumela tsholofetso ya Modimo gore sebaka sa bopelotlhomogi jwa ona bo feta sebaka sa go galefa. Khutsafalo e fetoga boitumelo.

Tshipi le tshipi re khutlisa tirelo ya Modimo ka tshegofatso. Mme ka mafoko ao Modimo o beile godimo ga rona – gore sefatlhego sa Morena se phatsimele mo go rona gore re itshwarelwe ke ena; e bile sefatlhego sa gagwe se tsholelediwe mo go rona gore re abelwe kagiso ya ona. Mafoko ao ke kgomotso le thuso ruri mo botshelong gore re dumele Modimo o o gaufi le rona. "Ka moo he, a re atameleng sedulo sa bogosi sa bopelotlhomogi ka dipelo tse di phutologileng gore re tle re amogele kutlwelo-botlhoko, re bone boitshwarelo, re tle re thusiwe ka nako ya teng." Heb 4:16 Amen.

9. Thapelo: Morena Modimo, sedifatsa dipelo tsa rona ka Mowa o o Boitshupo gore re ikanye mo go wena ka gale. Ga re ikanye ditiro tse di siameng tsa rona, fa re baya

mekokotlelo ya rona fa pele ga gago; mme re ikanya mautlwelo-botlhoko a magolo a gago. Re rapela mo leineng la Morena wa rona Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 10 - 10/11

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke C. D. Weber ka ngwaga wa 2007

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.